

清·黄钺撰

壹斋集 下

陈育德 风文学 校点



安徽古籍丛书

清·黄 钺 撰

壹
齋
集
下

陈育德 凤文学 校点



黄山书社

图书在版编目(CIP)数据

壹斋集(上下)/(清)黄钺撰;陈育德、凤文学校点. - 合肥:黄山书社,1999.9

(安徽古籍丛书第二十八辑/《安徽古籍丛书》编审委员会编纂)

ISBN 7-80630-412-6

I. 壹… II. ①黄…②陈…③凤… III. ①古体诗-作品集-中国-清代②古典散文-作品集-中国-清代 IV. I 215.2

中国版本图书馆 CIP 数据核字(1999)第 32175 号

黄山书社出版发行

(合肥市金寨路 381 号)

新华书店经销 安徽杏花印务股份有限公司印刷

开本:850×1168 1/32 印张:33.25 插页 10 字数:620 千

1999 年 9 月第 1 版 1999 年 9 月第 1 次印刷

印数:0001-1200 册

定价:49.90 元(上下册)

(本书如有印装质量问题可向承印厂调换)

壹斋集 诗集卷二十三

古今体诗四十六首

尽辛未一年

辛未正月五日，再至澄怀园直庐

一

三年池馆未全荒，重扫蛛丝置笔床。负日园丁惊我老，营巢林鹊学人忙。京师气候稍晚，园鹊每以正月始为巢。惭无元亮斜川兴，空有羊昙别墅伤。仰见竹椽思往事，赏音难觅蔡中郎。

二

失笑今吾尚故吾，镜中鬓发迥非初。肥饶一任争三虱，朝暮何曾易两狙。青史功名凭魏丙，白头踪迹合樵渔。家山好在劳神往，谁是当年旧草庐？

三

门外春风车马喧，寂寥辜负好林园。灯花穗落知中夜，爆竹声多近上元。官冷那禁童仆散，愁深怕对子孙言。据鞍且复夸轻健，西探潯沱直到源。时派西巡扈蹕。

忆昨行，寄张映汉方伯太原

忆昨自楚来晋阳，时惟十月四野霜。倾城冠盖出迎我，故人喜见金与张。金君应璫时官藩司，君官臬司。筠庄金君字同年复同里，君昔民部同为郎。官厅握手大笑乐，谓可三载相颉颃。君言征裘且勿脱，天寒此地宜壶觞。招邀衙斋急命酒，次公在昔醒犹狂。嚶鸣得友那能已，鼯腹易满谁为量。须臾玉山自倾倒，温柔花旦交扶将。肩舆不省宿何处，醒见红日升西墙。那知半载即赋别，我留汾浹君潇湘。是时筠庄颇善啖，子敦躯干方昂藏。缅怀清风辄交忆，岁时宴集尤难忘。可怜声华正鼎盛，悠悠变易同沧桑。人生聚散本萍梗，逝者如此存可伤。去冬及瓜我北上，君逐汾雁翻西翔。代飞已分交臂失，合并何意西园旁。倾困倒屣话未了，惜即被命行匆忙。犹幸西巡许扈从，幕天席地看清凉。三年之别十日聚，截鹤续凫稍可偿。惟愁高寒砭肌骨，不敢烂醉污衣裳。云龙上下谅不可，彭佺比寿应未央。

题李在击缶图

三叟箕踞秋树根，浊醪满贮老瓦盆。一叟闭目杯覆面；一叟听歌手不樽，以腹应节鼓且扣；一叟借箸击瓦缶，目注舞者背负孙。舞者一巾一秃髻，巾者插羽当春幡，胫骨裸露如鸛奔。旁有一人弦拨鵠，攒眉苦叶歌音繁。妇姑牵抱儿语喧，弱女寒俭温柔存。陈风秦俗姑勿论，一十二人分卑尊，一貌取笑欲言。盘飧蔬藟无鸡豚，谁投狗骨啖以蹲。想当仓廩新谷屯，龙不夜吠月满村。催租无吏来敲门，儿有複襦妇有褌。睡足屋角明朝瞰，黄绵醉倒真奇温。不知怀葛宁羲轩，人生至乐惟愚屯。我不识字忧亦烦，何曾饥饿绝瓮飧。不异梦饱娛心魂，似看三叟髯微掀。芒芒何处君家园，欲营此乐非朝昏。

扈跸西巡，奉勅画长城岭图

缥囊韬笔锦裹砚，奉勅看山画山面。特许先期款段行，不比传呼画师贱。去年冬自山中来，五岳雪霁关门开。长城东下势斗落，如丸走坂头难回。紫紵线路举足碍，曲曲穿珠蚁成队。惟防鞞确险在前，那识幽奇良其背。今春扈跸重跻攀，天教覲面穷孱颜。扶輿磅礴不可貌，约略形似惟岩关。碧云澹沲泉琤琤，山灵亦解来逢迎。溪桃破靨杏花喜，并入绢素骄春晴。图成三日再拜上，五字天题邀睿赏。朗吟惊定起文殊，古雪潛消众山响。

再至白云寺

经阁嵒峽夜气清，重来犹恋宿桑情。涧冰坚厚啼猿绝，木叶纵横卧虎惊。一榻为谁当牖设，白云依旧与檐平。山僧何必曾相识，自有烟霞管送迎。

管仲姬澄泥小砚

澄泥小砚三寸强，吴兴夫人之所藏。铭词古篆戊子制，子昂时甫征为郎。是岁公年三十五，玉润珠明惊世祖。晓启曾经画远山，归思未用歌渔父。赵文敏以至元丙戌被征，丁亥授为兵部郎中，至戊子，公时年三十五岁。《管夫人渔父词》为皇庆二年书，公年六十矣。摩挲大雅互分携，大雅，文敏砚，见《云烟过眼录》。何日转成你我泥。浓磨兴到潇湘竹，新浴香流馥不溪。制作犹存虢州法，珍藏不用琉璃匣。玫瑰赋质晓霞明，金泥涅盖盘螭活。堆鸦鬓发墨光妍，曾照鸥波人比肩。流传又到观生阁，璧友重逢五百年。人间岂少贤夫妇，只有箫鸾是仙偶。当垆人作白头吟，词女夫难金石久。即今片玉色磷璊，想见薰香浣笔人。定知什袭贻孙子，仲穆生儿有凤麟。

题指画鹰

主人使指不使笔，万管不如指有力。纵横如意左右能，走者予蹄飞予翼。珠帘窈窕地几砚清，意气所

到天机生。忽然落纸为苍鹰，加毛减肌皆不能。宣和腰鼎众争购，饲养无人谙味漱。轻描淡朽形质非，绿鞵华绊丹青旧。何如顷刻弹指成，顾盼万里秋天清。中山毛颖喜辍泣，从此不忧缚系笔。

澄怀园浚池，荷花芟刈尽净，诗以惜之

清风雨洗长空旦，荷花绕屋开无算。晓起钩帘香满家，闲时对酒光浮案。消受频年不自奇，经行有客同声赞。凉堂已占水晶宫，四壁还张云锦幔。颇知人物愧彼都，那得绸缪歌此粲。不图三载去司并，雨与荷花解为难。一夕淫霖水入箱，几家池馆山为岸。疏川导滞属司空，马狗车栖便平内翰。先是积雨池溢，车不能行，有误直者皆镌一级。非宣夏潦暂时通，要使秋河百川灌。磨镜难容尘翳留，治丝先理管麻乱。夜静如闻仙子愁，雨馀似有鸳鸯叹。千夫猪鸭倏投泥，一霎彩云吹尽散。仓黄粉镜毁新妆，错落翠盘绝珠贯。锦袜空馀尘土香，仙裙皱任儿僮玩。花如解语定可怜，鱼若有情亦惊窜。我时惆悵悟因缘，卅载光华极璀璨。几人听雨到更阑，若个招凉临日旰。将衰更盛理固然，云霞暂遣玻璃换。不须懊恼眼中花，差喜清凉身不汗。好待龙宫涌白莲，四时不落从君看。

秋感十首

一

小别江乡一纪餘，梦中烟水足菰芦。玉溪剩有名书籍，魏野曾无宅可图。嘉会因时常省录，衰颜对

酒不能朱。最怜欢笑和谁共，满眼儿孙迹转孤。

二

凉堂四面种芙蓉，一榻闲身劣可容。苔叶暗封砖缝合，帘纹密印水波重。读书悔未窥袁豹，疾恶时犹骂董龙。归兴知为山色笑，秋来毕竟让渠浓。

三

骅骝早逐穆王游，骏骨千金孰见收。一自论诗推郑紫，翻教激赞到梁丘。龙从画里真难见，鹿覆隍中失易求。极目江天波浩浩，不知谁是济川舟。

四

露坐空庭夜未分，银河耿耿净纤云。一天星气凉如此，满耳蝉声寂不闻。莫学卢仝歌月蚀，空传崔浩解天文。愁心欲写云山隔，玉塞秋风托雁群。

五

读书经世本同科，美玉良金待琢磨。贫笑市瓜惟取大，庸怜买菜只求多（二）。功名黄霸晚犹减，才思江淹老若何。为语少年须努力，白头容易叹蹉跎。

六

别裁伪体记韩欧，一代宗风不可求。莫被刘几欺轧茁，须妨坐客会于休。琳琅要令千秋鉴，藻采毋惊五凤楼。暇取《南华》日披览，深虞谬种或传流。

七

朝登苑闋暮平康，得意看花有底忙。共诋虞山为浪子，我因高第惜裴郎。风云累牍工何益，忠孝焚香愿要偿。果有罪言能报国，不妨容尔牧之狂。

八

土龙当狗贵因时，訾訾何妨任意为。不碍种桐酿马酒，难堪起宅徙羊碑。云峰变灭须臾耳，花雨缤纷姑听之。却怪旁人辄膏吻，那知有客正攒眉。

九

请郡投间古有之，未闻择职较安危。黄金自信能无辱，白璧谁云不可为。郭伋再来争共逐，温公未相已群推。选官图在从君掷，叵耐人人只疗饥。

十

不脱朝衫不闭房，登真别有枕中方。雪丹僥得偕仙偶，碧落依然领侍郎。鬼笑术精营十一，人言心

计妙研桑 (三)。莫嫌举室清斋苦，家擅吴羹胜道场。

题汪立信赠文信国砚

砚侧题云：「京湖制置使汪立信赠天祥。咸淳十年甲戌，文氏家藏。」下

有方寸印，文曰「文山」。旁有椭圆印，文曰「杨氏珍宝」。下方为「成化二十三年杨文和公书」。公

《衣带铭跋》云：「信国公片言只字，人得之宝如圭璧，况遗像砚耶？余末小子何敢题识，即书公

《衣带》中语，以作公像赞，谨勒于砚右。」背刻公遗像，多髯，殆后人摹刻者。匣有乾隆丁巳休宁程

恂题「宋少保枢密使文信国公遗像砚。明华盖殿大学士杨文忠公藏。」盖此砚曾归程耳。今不书遗像

砚，曰「汪立信赠文信国砚」，以人重也。像则非所本有也。今藏叶东卿志洗处。

我昔曾题信国琴，今又获见信国砚。此砚初非玉带生，背有当年丞相面。旁镌正隶字廿一，咸淳十年岁甲戌。大书立信赠天祥，质实应为公手笔。汪时慷慨有奇谋，二策抵地旋归休。想当淋漓濡大笔，墨池屈曲蟠蛟虬。江淮再起汪殉节，公亦勤王历闽粤。从此凄惶石友知，不知仓卒何年别。呜呼，建康柴市何从容，两公就义将毋同。不敢题识新都公，我请易名为二忠。砚兮砚兮谁磨礲，但觉篋衍吐气如长虹。

送刘珊之官安徽

刘君楚才士，丁卯余所录。榜发来谒余，举举有边幅。时余迫西征，钱饮苦征逐，未暇与深谈，遽

别尤湖曲。明春礼闱罢，寓我以赤牒。骈俪学宋人，文章颇华缚。意欲招之幕，谓已返家塾。今年取高第，蓬瀛望可蹴，不图百里才，竟绊千里足。使星照吾乡，遥为乡人祝。贤豪世急需，斯民谅蒙福。吾乡与楚邻，规模同趵趵。儿时诸父兄，守身洁如玉。长老冬不裘，布衣绵取燠。学僮一缊袍，二十犹著绿。及我观政归，教授皖歙六。诸生相见时，楚楚冠裳肃。然惟事弦歌，未敢问丝竹。别来十三年，传闻骇且恶。家无中人产，粮无三月蓄。有酒必徵歌，明眸昵华烛。怀金趋官衙，不畏旁人矚。侥幸弋科名，其祸流最毒，此犹列衣冠，下更无检束。诗书束不观，讼牒读颇熟，伺隙挟官长〔四〕，悬鞭不敢扑。因之横里间，道路辄以目。大都江水分，强弱各有族。新安朱子乡，闺门尚雍睦。宁池半山居，廉谨亦龌龊。惟庐及凤颖，斗狠常不缩，得失争鸡虫，陷胸或洞腹。颖更多盐梟，结党走山谷，擒之即伤人，案之憚穷鞫。曩时文正公，屡屡诫司牧，维时吏无才，慎恐兴大狱。姑息不数年，奸民乃哄宿。方今大吏廉，瘠土皆化沃，蠹贼儻不生，庶几获嘉谷。君家宦三世，神明众所服。治谱自有传，请先效忠告。示俭屏声华，戒贪抑童仆。任力兼任人，以严毋以酷。忠信十室存，一怨而百勗。第种河阳花，缓蕝柴桑菊，如龚治渤海，如文化西蜀。农使服田畴，士俾知耻辱。此邦况多贤，毋让千秋独。朱邑祀桐乡，合肥颂刘馥。任有防溪村，时留寿春棧。宣城与滁州，各各著芳躅。三年政有成，一卷诗可续。我老时归休，再睹儿时俗。从君受一廛，西畴事斲刷。

九月五日，偕田嵩年及儿子初民、少民登玉皇庙东台作

凉秋忽向尽，几日邻重阳。登高苦无地，中庭但彷徨。儿曹谓城西，古寺台可望。车驱不里许，瞥见松柏苍。高阁矗弥罗，赤金范文昌。青红填鬼物，礧礧惊神光。借问新者谁，缙绅继貂珰。庙为天启四年群阉所建，今雷神中尚杂以阉像。近加修葺者，殆不悟也。邀福取贵仕，咄哉真痴狂。其东峙平台，左右森修篁。梨桃杂榆柳，纵横不成行。原草耿餘绿，林叶含新霜。午热头尚科，露顶风微凉。休沐近五旬，郁居歌慨慷。凭临一舒啸，四顾何苍茫。即此是佳节，安用茱萸囊。呼儿进茗饮，聊以代壶觞。

薛文清公砚

砚长四寸许，宽三寸，背镌篆七字曰：「万里桥西一草堂」。后行书跋云：「余四人以

有事在蜀，因游杜工部浣花溪上之草堂，过遇仙桥，憩青羊宫，见此砚，异之，遂售以归，仍取子美句志之。河津薛瑄、张固、李匡、罗俊全鉴赏。」按，固江西新喻人，官吏科给事中，景泰元年迁大理寺右少卿，镇建昌。匡浙江黄岩人，以金都御史巡抚四川。俊江西泰和人，官御史，景泰中按蜀。

一

昨试河汾士，曾过夫子乡。崇祠隔旁县，凭轼未升堂。遗集诸孙赠，清名异代香。墓田渺何处，闻说已全荒。

此砚成都得，公方游草堂。一时三獬廌，同憩在青羊。铭背当行记，题名共鉴藏。会须携石友，相与荐馨香。

司马温公与兄子九承议书断石仅存五十六字，叶志诜上舍琢其背为砚，仍以全文重摹刻石索题

世间异事胡可料，司马家儿不知孝。传家家训束不观，独乐深衣枉身教。宁州赴任有底忙，夏县高堂几何毫。硬差致仕既不能，却恣愚顽但嗟悼。家书仔细十八行，恩意殷勤再三告。以官呼侄已称名，纸尾庄书叔光报。此碑残石获何年，琢砚镌铭聚所好。更觅全文重手摹，要为名场镇浮躁。前年按试到公乡，绝少雲仍在学校。遍求名籍得武童，急录一人奉家庙。忠贤后嗣类不昌，况公盛德尤难肖。尔时未暇询旁支，仅拓丰碑拜遗貌。我思仕宦为娱亲，亲老何堪违色笑。西山日薄意不欢，南陔笙好难成调。于今不乏《九承议》，第少公书厉风操。愿君收砚勿轻示，怕有旁观讶讥消。

买菊

一

出山非尔志，入市助人豪。未免泥涂辱，何妨声价高。一肩秋露重，几日井甕劳。但对陶潜酒，休污毕卓螯。

二

节物人争买，家家照眼明。何曾爱佳色，惟解务虚名。茅店酒旗雨，山园霜日晴。几回幽赏处，相对讶前生。

忆子卿

并宅人何处，离居今几年？深灯桑落酒，细雨菊花天。送子入齐赘，将家上楚船。此时无一字，知少治装钱。

自遣偶作

一

白尽髭须作大公，含饴一笑对西风。自惭不识康成面，妄想诸孙学小同。

二

稚齿饥驱到白头，先生不是不风流。变童季女缘都薄，竟作人间许散愁。

三

买邻买宅说徒然，积壁谁分压倒钱。岸上无舟水无屋，萍浮人海十三年。

四

黄山记昔观云海，足底青云头上天。山下岂无人望我，云中何必尽皆仙。

五

曾闻说士甘于肉，亲见玄晖共奖成。休怪儿曹浑不解，卅年前本未尝生。

双古戈，为东卿赋

东卿示我双古戈，名之曰琯曰右军。胡三援四考工法，莫辨孰周孰先秦。琯戈背有铭文四，彫鏤夔龙甚精致。欲读还疑口但咤，我本空疏不识字。右军稍短铭篆小，青翠满身质完好。谓是始皇廿四年，尚未销兵时所造。想当执此乘辂车，长弓大箭为前驱。搥喉斩馘最精锐，铜花古血交模糊。从来好古物相聚，送与东卿好藏弃。款识频频烦薛尚功，著书要继刘原父。我作短歌君莫嘲，劝君惟用虎皮包。须防半夜光如烛，化作双龙飞出屋。

九日儿辈同人陶然亭登高，分韵赋诗，竟以长篇角胜，作此示之

一亭西瞰众山幽，九日城南近可游。自古登高须作赋，从来名士善吟秋。滕王落笔千言富，邠老催租一句留。输与黄花斗奇丽，笑临流水独夷犹。

宿燕郊客舍，主人赵某榆次田村人，闻余至，一时商于此者，争来问讯，感而有作

曾经榆次田村过，不识燕郊抱布氓。一榻偶分眠食地，三年惭说鉴衡精。索书墨渚经宵淡，为秣青